

Exposiziun da maletgs fletrai ella claustra da Glion

■ (cp) Tgi che legia il plaid «maletgs» patratga en emprema lingia a maletgs colurai sin teila. Erica Klucker da Tumein (oriunda da Ruschein) va dapi enzacons onns tut atgnas vias. Ellas scafescha ses maletgs cun launa nuorsa dad Avras, la quala ella fletrescha a veritablas ovras d'art. Las pli novas creaziuns dall'artista ein exponidas naven da vendergis, ils 31 da mars entochen vendergis, ils 31 da matg el Foyer Sentupada ella claustra da Glion.

Erica Klucker ha ina liunga relaziun cun la claustra da Glion essend ch'ella aveva fatg la scola secundara leu e frequentau l'instrucziun da malegiar tier sora Anita. Leu ein sias habilitads da designar vegnidas scoladas e siu plascher da formar creativ ei vegnius svegliaus. Perquei selegra ella particularmein da mussar ses maletgs fletrai en quei liug special.

Avon 10 onns ha la scolasta per la formaziun textila giu l'idea da scaffir maletgs da launa enstagl da picturar maletgs d'acril, ils quals ella presentava ad exposiziuns da pli baul. L'exposiziun da maletgs fletrai a Glion ei gia sia tiarza exposiziun da quei gener.

En ses pli novs maletgs tracta Klucker il tema «Il plascher da viver». En cumparegliaziun cun las ovras mussadas el Va Bene a Cuera ed ellas localitads dalla Dok-Kommunikation a Wetzikon ein las ovras novas pli pintgas e meins abstractas. En lur center stat il carstgaun, il pli savens affons en diversas situaziuns da veta.

La vernissascha dall'exposiziun da maletgs fletrai d'Erica Klucker ha liug igl 1. da mars denter las 15.00 e las 19.00 el Foyer Sentupada dalla claustra a Glion.



«Il plascher da viver», maletg fletrau dad Erica Klucker.